

UNE SORNADE TAL PALAÇ

Cun Lussie Sasso e Pieri Fontanin o ài stât ancje jó a compagnâ Fidri dai Ros la di ch'al veve di fâ la consegne simboliche des 93.541 firmis a pro de region autonome Friûl. Cuatri gjats par un fat straordenari.

An sares tantis di di sun chê sornade: dal mausoleo che ti ven frêt dome a meti pît dentri, des cursiis colôr pantiane, de sdrume di scrivants e impiegâts e segretaris, dal fotografo che ti litrate e no ti consegne il litrat. O dai conseîrs ch'a balinin sù e jù, ca e là tanche furmiutis, ancje se lis furmiis a son nomenadis plui par chel ch'a fasin che no par trop ch'a balinin.

Mi fermerai a cualchi «flash» o lamp di chê storiche sornade.

Turel, ch'al è di Bicinins, par vie ch'al è pressident de region autonome «Friuli-Venezia Giulia» nol à podût scantinâ un et de sô incarighe olimpiche che lu sisteme fûr de storie, soledut de storie de sô int. Al à «cjapât at».

I conseîrs, a mieç dai rispjetîs deans, a vevin di dâi dongje te sale colôr cîl ducj insieme. A son rivâts cuanche àn podut e chêi che ur à parût. A mancjavin i republicans, i liberâi, i socialdemocraticis e, che nus à maraveât no pôc, i democristians. Al ere Cjarpenêt, ma rivât al ultin moment e a non so. Juste in timp par fâ une figure sclagne, ancje s'al à salvât la muse dal partît. Coerent il missin Morelli, restât ae Italie risorgimentâl; cjacaron De Agostini dal MF; un tic sirucât il cumunist Pascolat; preparât e franc il DP Cavallo; imberdeât Cjarpenêt, che nol rive, insieme cun Bressani, a capî che i furlans a son minorance etniche. Chêi che plui e àn fat dûl e rabie il sloven Stoka e il socialist Saro, furlan di Martignà.

Si scrupulave che Stoka, jessint minoritari, nus vares capîts. Invessit al à laudât che mai i triestins e l'unitât regjonâl, inventant miliarts che lôr nus varessin dât intant dal taramot (e no l'incontrâr, che lôr e àn roseât tai nestris damps) e paventant ce ch'al sucedares se i triestins, spacansi la region, no podaressin plui vignî a sgliciâsi in Friûl. E nissun nol veve fevelât di stangjs, ansit. Saro si è confessât che l'autonomie furlane domandade dai socialiscj dal '78 al ere stât un àt emotîf, su l'onde de furlanetât spissulade fûr cul sisma. Il gnûf verbo craxian al é: vê dut tun pugn par podê messedà miôr. Duncje nuje divisions, ma efficientisim.

Sun tun pont ducj si son cjatâts dacordo: che dibot 100.000 di lôr a son un fat «non trascurabile». Stranie cheste balance, di int che si bute malade cuanch'a piert une zumiele di vôts e che no si scompon denant di un popul ch'al dîs di no a pleton a di une region bastarde!

A gustâ, che àn ancje il bufêt e convenient ancje, nus à fats restâ scaturîts il socialist Ermano, tumiecin. Al ere di vene juste. «Par nô cjargnêi al esist un sôl nemî: il furlan, che nô cui talians si cjatin benon!». «S'al jentre il furlan tes scuclis (la lenghe, n.d.r.), o tornin indaûr di tresinte agns. Vuê tes scuclis si à di studiâ

francês, inglês e rus. Crodeimal a mi, ch'o ài mandât pal mont miârs di zovins des mes scuelis e che si àn fat onôr!».

O sin jessûts cun cheste figure miege dirocade di un pulitic che si vante di vê mandât pal mont la sô int, inpen di vêle fate restâ a scombati e a dâ il miôr di sê te sô tiere. No son ducj cussì, ma ti fore il cûr a sintî putanadis dal gjenar.

Di fûr al pluvisignave e al sbuereave che ti jentrave tai vues. Ma amancul si tirave il flât.

E nus è vignude une gole osteade di tornâ di corse di corse tal nestri Friûl, martar e par malis mans.

Tornant cjase, o ài provât ce ch'al veve provât chel gno frut ch'al veve scrit tun compit: «E così finì questa bella giornata!». Al veve stât tal simiteri.

Marc 1984

Antoni Beline